



ル 4
4763
3



門 4
號 4763
卷 3

琉球入學見聞錄卷之三



琉球官學教習臣潘相恭輯

奏疏

臣按琉球入學始自明洪武二十五年疏數不常
原無定例世遠事久亦無奏疏可考至我

朝康熙二十三年遣使冊封既畢國王面求使者附
奏祈許子弟入學使者還奏

天子允之自後每遇冊封遂沿爲例凡冊使之奏部臣監
臣議准一切保舉教習事竣保題之奏國王遣送
入學及請歸之奏歸後謝恩之奏此次請許官生
一例迎

駕之奏皆錄焉

康熙二十三年禮部謹奏爲奏聞事據差還琉球
國翰林院檢討臣汪楫中書舍人臣林麟焟疏言
中山王尙質親詣館舍云下國僻處彈丸常慚鄙
陋執經無地向學有心稽明洪武永樂年間嘗遣

本國生徒入國子監讀書今願令陪臣子弟四人
赴京受業事下臣部臣部咨國子監據國子監臣
咨覆查太學志載洪武二十五年秋琉球國王遣
其子日孜等及陪臣之子入監自是以後至於隆
萬之際凡十四五次來學向慕文教琉球於諸國
爲最篤國家待之亦爲最優臣等覆查史載唐貞
觀中興學校新羅百濟俱遣子入學琉球自明初
始內封會典載大琉球國朝貢不時王子及陪臣
之子皆入太學讀書禮待甚厚又載洪武永樂宣

德成化以後琉球官生俱入監讀書今該國王尙
貞以本國遠被

皇仁傾心向學懇祈使臣汪楫等轉奏願令陪臣子弟四
人赴京受業應准所請聽其遣陪臣子弟入監讀
書俟

命下之日知會該國王可也奉

旨依議欽此

二十九年琉球國中山王臣尙貞遣使入貢並以
求遣官生歸國奏請奏爲籲

懇請許歸養以廣

皇仁事據臣國入監官生梁成楫等啓稱楫等於康熙二
十五年遵

旨同貢使進京入監讀書抵今四載感荷

皇上優恤之恩給以廩餼衣服楫等雖頂踵俱捐

天恩莫報况學海之淵源深遠

聖朝之法制昭明雖終身寢食其中亦楫等所深願但緣
貢使毛起龍等入京得接家信知父母衰老倚閭
望切楫等雖三冬之講究宜深而一本之瞻依倍

摯此陳情表所以有報劉日短之語也叩祈恩賜
具疏題請歸國等情據此該臣貞案查康熙二十
三年蒙冊封天使汪楫等題准臣國陪臣子弟入
監讀書臣貞遵奉

諭旨業於康熙二十五年遣官生梁成楫等三人同貢使
魏應伯進京仰荷

皇上令其入監讀書月糜廩餼季給衣服正梁成楫感
荷高厚殫心誦讀之時也但伊父前經節次入貢
萬里梯杭罔辭勞瘁今皆年老奉養需人臣貞亦

當念之矣且梁成楫等三人俱未有室父母之願
人皆有之况臣國人皆愚昧自成楫等入監之後
臣貞望其返國與臣言忠與子言孝以宣布
皇上一道同風之化更爲不淺今據梁成楫等祈題請歸
養等情應否准其歸養臣貞未敢擅便伏祈

睿鑒施行

梁成楫等歸國之後王又上謝表表云琉球國中
山王尙貞謹奉表上言伏以布教溢中華設席闡
洙泗之秘覲光來異域執經分泮水之光棧樸篇

中時展縹緗歌夜月杏花壇上長垂衣帶拂春風
喜動儒林歡騰海國恭惟

皇帝陛下允文允武乃聖乃神王澤廣敷措一代於利樂
親賢之內文風遙播範四方於詩書禮樂之中臣
貞觀海有懷望洋徒歎眷中山而傾印綬蟻封久
叨帶紉之榮入國學而奉典章虎觀不遺鴛駟之
選一之以聲音點畫口誦心唯教之以節義文章
耳提面命况乎冬裘夏葛授衣盡內府之藏兼之
朝饗夕飧賜食悉天厨之饌恩深似海難忘推解

之隆澤沛如天莫報裁成之大雖三年國子敢云
得九邱八索之微言而一介豎儒猶幸聞四書五
經之大旨祇爲養親念切

君門上重譯之章何意逮下恩殊

天闕賜遠鄉之詔歸而言忠言孝咸知君父之尊固當獻
藻獻芹聊表臣子之敬伏願車書一統玉帛萬方
有分土而無分民到處珠璣生腕下得大才乃得
大用何人錦繡不胷中行見耳目股肱不出圖書
之府亦使東西南北無非翰墨之林矣臣貞無任

瞻

天仰

聖激切屏營之至謹奉表稱謝以

聞

康熙五十九年七月內差回琉球國翰林院檢討

臣海寶編修臣徐葆光謹奏為奏

聞事臣等奉

旨冊封琉球禮畢宴語王令通事致詞云本國僻處海外

荒陋成風於康熙二十五年奉

旨許遣官生阮維新蔡文溥等三人入學讀書今得畧知

文教皆

皇上之賜也自此三十年來無從上請今幸

天遣使臣至國求照前使汪楫代請入學讀書舊例陳明

遠人向化之意倘蒙諭允得照前例再遣官生入

學讀書則

皇上文教益廣矣臣等理合據辭繕摺代奏伏候

睿鑒施行奉

旨該部議奏欽此禮部請題為奏

禮部禮科抄出差回琉球冊封正使翰林院檢討海寶副
使翰林院編修徐葆光等奏前事等因到部臣等
查康熙二十三年差往

冊封琉球國王使臣翰林院檢討汪楫等將該國王尙貞
所請令陪臣子弟赴京入監讀書等語轉奏到部
臣部照其所請議覆具題奉

旨依議欽遵在案今琉球國王敬傾心向化旣稱再請將
官生入學讀書則

皇上文教益廣等語應如所請准其官生等赴京入
書應行事宜到日再議具題可也於康熙五十九
年八月初三日題本月初五日奉

旨依議

雍正元年十月初九日琉球國中山王尙敬謹奏
爲

聖朝文教廣被萬方奉

旨遣官生入太學讀書事康熙六十年六月十三日准禮
部咨開爲奏

聞事主客清吏司案呈奉本部送禮科抄出該本部題前

事內開議得

冊封琉球國王使臣翰林院檢討海寶編修徐葆光等代
臣奏稱本國云云等因於康熙五十九年八月初
三日題本月初五日奉

旨依議欽此欽遵抄出到部相應移咨琉球國王可也等
因奉此欽遵隨於康熙六十一年十一月遣官生
蔡用佐蔡元龍鄭師崇三人同貢使毛弘健等赴
京入監讀書不幸在海沉沒伏思臣敬業奉

聖祖仁皇帝恩允未應俞旨今不敢違

先皇遺旨再遣官生鄭秉哲蔡宏訓等三人偕慶賀正使
王舅翁國柱等赴京入監讀書誠俾海外愚陋子
弟得以觀光上國執經問字踴躍之私不啻臣身
躬聆

聖訓舉國共沐

天朝雅化於無窮而我

皇上文教被萬方益廣矣外肅貢土產細嫩土蕉布五十
疋圍屏紙三千張少佈涓滴微忱爲此合具奏明
伏祈

皇上睿鑒勅部施行臣敬無任戰慄惶恐之至謹具奏以聞

雍正二年十二月十五日禮部臣謹奏爲請

旨事該臣等議得國子監祭酒宗室伊爾登等疏稱禮部劄送到琉球國陪臣子弟鄭秉哲鄭謙等到監臣等詢其聲音粗通漢語問其欲習何業皆欲願學八股文字臣等謹遵舊例選取貢生李著俾之朝夕講解學習文藝臣監現今博士員缺未補今派學正一員暫行董率俟博士到任仍照例令博士

專管臣等不時稽察至教習廩糧咨部考職等項應仍照官學教習之例等因具題前來查康熙二十七年琉球國陪臣子弟梁成楫阮維新蔡文溥等入監讀書臣部議覆選取貢生一名令其教習派博士一員專管董率該監堂官不時稽察至教習廩糧咨部考職等項俱照官學教習之例行等因具題奉

旨依議欽遵在案今琉球國遣到陪臣子弟鄭秉哲等入監讀書應照二十七年之例選取貢生內文行兼

優者一名盡心訓迪派博士一員專管董率該監堂官不時稽察其教習廩糧咨部考職等項仍照官學教習之例遵行其陪臣子弟鄭秉哲等居住房屋四季衣服及食用等項亦令該監堂官不時稽查務各令得所不致短少遲悞以仰體

皇上加惠遠人之至意爲此具奏伏祈

睿鑒施行謹奏本月十七日奉

旨依議欽此

雍正八年十一月二十一日琉球國中山王臣敬

謹奏爲恭謝

天恩肄業官生奉

旨歸國事竊照雍正七年四月初四日准禮部咨爲

天恩之高厚靡涯親年之衰邁日甚乞請歸養以遂烏私

事主客清吏司案呈本部奏前事內開准國子監

咨稱據琉球國肄業官生鄭秉哲鄭謙呈稱秉哲

等雍正元年奉

旨入監讀書於二年到京就館四載以來荷蒙

聖澤優渥賞給飯食衣服器用虛糜無數秉哲等向化敬

業霑被日深當

聖天子文教覃敷愚蒙漸啓從事經書固欲窮其奧旨傾

心制義畧已學爲成篇臣按琉球不設科目故不學制義所欲講者四書五

經小學近思錄所欲學者詩與四六及論序記而四六尤要鄭秉哲等初入學時不能聲明至令舍

其所學而學制義三年歸國一切惘惘甚拂國王造學之願此次鄭孝德等到監卽將此告知故專

令讀正書學古律駢散各所願驅策駑駘獲識昭體四年歸國頗成章可觀

明法度近緣貢使毛汝龍等來京接有家信知雙

親益衰倚問迫切秉哲等葵誠就日方瞻聖學之

精微鄉思隨雲還仰

皇仁之浩蕩伏惟

皇上孝治丕顯錫類多方垂念遊子戀親定許遠人反掉

叩祈太宗師恩准題請歸養俾得奉侍晨昏乞採

將父將母之意以宏教忠教孝之化訓迪彝倫無

非至誨秉哲等抵家惟焚香頂祝

天子萬年且將

天朝威儀廣宣雅化焉伏祈具題據此相應呈送貴部應

否題請之處聽候貴部照例施行等因呈送到部

查康熙二十七年琉球官生梁成楫等進京入監

讀書至三十年入貢時該國王題請歸養臣部議
覆照都通事之例賞賜筵宴馳驛歸國在案今鄭
秉哲等雖未經國王題請但懇祈歸養乃人子之
孝思且情詞懇切甚屬可憐應如所請令其歸國
其歸時亦照都通事之例賞給大綵緞各二疋裏
各二疋毛青布各四疋跟班二名亦照例賞毛青
布各四疋其賞賜之物於該部移取在臣部賞給
仍筵宴一次給驛令隨貢使毛汝龍等一同返國
俟

命下之日知會琉球國王可也等因於雍正六年三月初

二日交與奏事員外郎張文斌等轉奏本日奉

旨官生等每人加賞內庫緞二疋裏二疋從人等每人著

加賞官緞各一疋欽此欽遵到部相應移咨琉球

國王可也爲此合咨前去查照施行等因准此臣

敬接讀部咨仰知

皇上以仁孝之性宏錫類之風令鄭秉哲等歸養不獨二

人闔門頂祝卽舉國臣庶感

天朝曲成不遺之化靡不歡聲載道矣臣敬夙荷覆載莫

報

高深謹於常貢外另具嫩熟蕉布一百疋圍屏紙五千張

順附貢使向克濟蔡文河等齎捧表章叩謝

天恩外理合具疏奏明伏祈

皇上睿鑒勅部施行臣敬無任戰慄惶恐之至謹具奏以

聞按同口國王又具表謝恩仍用康熙二十九年梁成揖等歸國國王尙貞表文不贅錄

乾隆二十二年四月二十一日翰林院侍講臣全

魁編修臣周煌謹奏爲據詞代請事臣等蒙

恩簡用遠使琉球事竣將旋中山王臣尙穆詣館宴送

令陪臣通事向臣等致詞云海隅下國叠被

皇上

宸翰榮褒

綸音寵錫但僻處彈丸荒陋成俗向學有心執經無地

先於康熙二十二年經懇前使汪楫等代請陪臣

子弟四人入學讀書奉部議准遣官生阮維新等

入學在案嗣於五十九年懇前使海寶等援例代

奏復蒙許遣今幸

天遣使臣至國敢祈陳明遠人向化之誠俾得再遣入

王王入學見聞錄 卷之三
學讀書下國不勝悚企等語臣等理合據詞繕摺
代奏伏候

聖鑒勅部議覆施行謹奏即日奉

旨該部議奏欽此

五月初一日禮部謹奏為遵

旨議奏事乾隆二十二年四月二十三日內閣抄出翰
林院侍講全魁編修周煌奏前事等因具奏到部
查康熙二十三年

冊封使臣翰林院檢討汪楫等五十九年使臣翰林院檢

討海寶等事竣回京具奏稱該國王懇求轉奏令
陪臣子弟入監讀書經臣部覆准具奏奉

旨依議欽此隨據該國王前後遣令官生到京臣部並劄
國子監讀書三年遣令歸國各在案今翰林院侍
講全魁等既稱該國王尙穆向化輸誠懇請許陪
臣子弟入監讀書應如所請准其於應貢之年遣
令來京臣部劄行國子監肄業俟

命下之日行文福建巡撫轉行該國王遵照可也謹奏
本日奉

旨依議欽此

乾隆二十三年十月十一日琉球國中山王臣尙
穆謹奏爲奉

旨遣官生入太學讀書事乾隆二十三年正月初一日
准福建等處承宣布政使司開前事等因咨院行
司奉此茲貢船回國合就移知爲此備咨貴國王
請煩欽遵查照施行等因准此臣穆蟻垤藩封蠲
居荒服恭逢

天朝文教廣敷德澤遠施今蒙

隆恩俞允俾陪臣子弟得入學執經俯聆

聖訓不特臣穆感戴無窮舉國人民亦懽躍忭舞矣謹
遣官生梁允治鄭孝德蔡世昌金型四人同貢使
毛世俊等赴京入監讀書外肅貢土產圍屏紙三
千張細嫩蕉布五十疋少佈涓滴微忱爲此合具
奏明伏祈

皇上睿鑒勅部施行臣穆無任戰慄惶恐之至謹具奏
以

聞

乾隆二十五年正月二十三日國子監臣觀保全
魁陸宗楷博卿額吉泰盧毅謹奏爲請

旨事乾隆二十五年正月初十日禮部劄送到琉球國
陪臣子弟梁允治鄭孝德蔡世昌金型四人到監
讀書臣等謹查雍正二年琉球國陪臣子弟鄭秉
哲鄭謙蔡宏訓等入監讀書經禮部議准照康熙
二十七年之例選取貢生一名令其教習派博士
等員管理臣監堂官不時稽察至教習貢生一切
等項俱照官學教習之例等因遵行在案今該國

主送到官生梁允治等四人入監讀書相應仍照
舊例臣等公同選得拔貢生潘相湖南安鄉縣人
爲人老成學業優長俾之朝夕講解教習文藝又
派得博士張鳳書助教林人樾俾之管理臣等不
時加謹稽察至教習貢生一切等項俱照官學教
習之例候

命下後臣等移咨吏禮二部存案爲此繕摺具奏伏候
皇上睿鑒施行臣等謹奏本日奉

旨知道了欽此

乾隆二十六年十一月初一日國子監臣觀保全

魁陸宗楷博卿額張俗學謹奏為請

旨事據琉球國肄業官生

陪臣鄭孝德等呈稱竊孝德

等籍隸球藩觀光

帝里蒙

皇上教育生成俾令肄業太學孝德等親師取友獲隨

兩序衣冠給館授餐日聽大昕鐘鼓百生榮幸感

勒五中茲恭遇

聖母皇太后七十萬壽普天同慶伏查舊例太學肄業諸

生俱得恭迎

慈駕今孝德等身依

輦下情切呼嵩敬請一體行禮等語臣等查該陪臣以

外藩陪隸現在肄業太學

皇太后萬壽慶典臣等應率領諸生迎叩

安輿伊等懇請一體行禮備詞肫切理合奏

聞請

旨如蒙

俞允請照朝賀之禮令其用該國服色合併聲明為此

王五
卷八三
謹奏奉

旨知道了鄭孝德等著賞賜欽此

乾隆二十八年十一月二十六日琉球國中山王
臣尙穆謹奏爲請遣入學官生歸國以宣文教事
竊臣穆僻處彈丸荒陋成俗幸於乾隆二十一年
叨蒙

天恩冊封事竣天使將旋臣詣館宴送兼援舊例懇求
天使全魁周煌代奏陳明遠人向化之誠俾得再
遣陪臣子弟入學讀書不昧悚企已經天使回京

代奏荷蒙許遣遵於乾隆二十三年遣官生鄭孝
德入監讀書於二十五年入監在案查康熙二十
三年雍正二年前後官生在監讀書各三年而歸
亦在案伏念官生鄭孝德等在監讀書已經四年
理應奏請歸國爲此肅具疏章特附貢使馬國器
梁煌等敬謹奏聞請將官生鄭孝德等賜歸下國
則益廣宣

皇上之文教以成雅俗矣伏祈

睿鑒勅部施行臣穆無任惶恐屏營之至謹具奏以

聞

乾隆二十九年二月初四日國子監臣觀保富廷
陸宗楷張裕榮謹奏為琉球肄業陪臣回國帶領
教習引

見事乾隆二十五年正月初十日禮部劄送琉球國陪
臣子弟入監肄業臣等查雍正二年禮部議准照
康熙二十七年舊例選取貢生一名令其教習一
切照官學教習之例遵行隨公同選得湖南拔貢
生潘相為人老成學業優長請以充補教習移咨

吏禮二部存案備查於乾隆二十五年正月二十
三日具奏奉

旨知道了欽此欽遵在案今准禮部文稱琉球國肄業
陪臣已奉

旨准其回國等因到監查該教習中式乾隆二十五年
舉人中式乾隆二十八年進士實心訓課造就有
方在學四年始終如一相應照八旗教習之例恭
繕綠頭牌將潘相帶領引

見或用為知縣或用為教職之處伏候

欽定奉

旨後臣等行文吏部請歸進士教習班銓選爲此謹奏
本日帶領引

見奉

旨潘相著以知縣用欽此

廩給

漢唐外藩遣子入學不過粗給廩餼洎乎明代琉
球子弟來雍始厚其賚予臣嘗考前明會典洪武
二十五年賜中山國入學王子日孜每闈八馬寨

官子仁悅慈衣巾靴襪並夏衣一襲鈔五錠秋又
賜羅衣各一襲及靴襪衾褥賜山南王承察度入
學從子三五郎尾及寨官子實他盧尾段賀志等
如中山例二十六年賜中山國入學寨官子段志
每夏衣靴襪秋衣各一襲僦從各給布衣二十九
年賜山南王歸省官生三五郎壘實他盧尾白金
綠緞表裏鈔錠又賜山南王入學寨官子麻奢理
誠志魯三人并復來卒業之三五郎尾衣冠靴襪
三十一年賜中山國來謝昔年入學舊恩之官生

姑魯妹鈔錠有差永樂三年賜山南國入學官生
李傑衣服四年賜中山國入學官生石達魯等衣
鈔有差八年皇太子賜入學官生模都古等巾衣
靴條衾褥帳具冬帝賜李傑等冬衣靴襪十年賜
中山官生懷德祖魯古夏布襪衫條靴十一年賜
中山官生鄔同久等三人錢鈔造模都古等三人
歸省賜衣幣鈔錠給驛傳留學者皆賜冬夏衣十
二年皇太子賜琉球生益智每等羅布衣各一襲
及襪衫靴襪衾褥帷帳從人皆有賜帝賜鄔同久
等三人衣鈔十四年賜琉球生夏衣成化十八年
令肄業南京國子監之琉球生蔡賓等有司歲給
衣服廩饌如舊制正德五年賜南雍琉球生等衣
廩等物如例嘉靖五年賜琉球官生蔡廷美等廩
米薪炭及冬夏衣服九年給歸娶之蔡廷美等幣
布有差二十二年給琉球歸娶官生梁炫等資糧
驛騎二十九年處琉球生蔡朝用等於南雍光哲
堂歲時給衣物如例萬歷八年給南雍琉球生鄭
週等衣糧如例顧猶未周備也惟我

聖主湛恩汪濊特命琉球官生光祿寺給食物工部給衣服器用戶部給口糧紙筆日有餼月有賜季有賚下逮僉從纖悉曲盡我

皇上格外體恤特命行文工部應給物件俱著交內務府辦給由是各衙門應給等項至豐且備

天恩浩蕩難罄名言詳志於篇庶來者有以考焉

康熙二十七年琉球官生梁成楫等入學禮部議准官生照都通事之例每名日給雞一隻肉二斤

茶五錢腐一斤椒醬油菜等俱備每年春秋賜綿緞袍褂紡絲紬褲各一涼帽各一靴襪各一雙夏賜紗袍褂羅衫褲各一冬緞面羊皮袍褂綿襖褲各一貂帽皮靴絨襪被褥席枕俱備從人皆有賜每月硃墨紙筆銀各一兩五錢

雍正二年十一月琉球官生鄭秉哲等入學禮部題准官生從人一切衣服食用俱照康熙二十七年題定賜梁成楫等之例

乾隆二十四年官生梁允治等十二月入京二十

五王入學身圖金 卷之三
五年正月初二日禮部劄知國子監二十三日本
監選取教習奏聞二月初八日禮部儀制司送官
生入學博士等官帶領謁

廟謁

後殿及文公祠入講堂拜師

一官生食用等項俱照康熙二十七年題准之例
每官生一名俱照進貢都通事之例每日各給白
米二升跟役每人每日各給白米一升國子監每
季核算人數小建總計若干石移咨戶部關領火
倉白米

一官生食物每人每日給雞一隻肉二斤茶葉五
錢豆腐一斤花椒五分清醬四兩香油四錢醬四
兩黃酒一瓶菜一斤鹽一兩燈油二兩跟役每人
每日給肉一斤鹽一兩菜十兩此次於乾隆二十
五年二月初六日准光祿寺知照內開大官珍羞
兩署案呈准國子監咨取官生食物等因前來查
乾隆二十一年七月內經忠勇公傅奏准將本寺
交送 內庭所用豬口肉斤雞鴨鵝隻等項交饈
房辦理所有 公主格格分例景山咸安宮太醫

院等處外用差務仍係光祿寺辦理當經本寺行文各該處將所用雞隻肉斤數目按月咨行本寺核算折價各該處持領付寺給發錢糧悉遵原奏辦理在案今琉球官生梁允治等入監讀書所有應食雞隻肉斤自應遵照奏准折給之例畫一辦理相應行文貴監查照辦理除將算開茶葉黃酒油鹽醬菜等項本寺按依每月來文辦給外至應給雞隻肉斤每月將伊等用過零總數目扣除小建禁屠一併行文過寺核算給發錢糧於每月三

九之期出具印領赴寺支領仍將本寺題定雞隻肉斤價值並應扣帶銷銀兩開單知照貴監查辦可也准此每月監領銀交官生等自用至廚役火夫每月寺另給銀四兩五錢聽其自雇

一官生住房撥西廂居之後一進五間官生四人各住一間中一間爲講堂正廳三間中一間設公座爲堂官稽查之所東一間教習居之西一間貯食用之物西耳房二間爲廚房住廚役火夫各一名東耳房住各從人下至溷浴溷側莫不修備每

歲四月之朔國子監行文內務府府遣官役高搭
前後涼棚二座八月底自行撤回
一官生等用物內務府廣儲司遵

旨辦送照雍正二年之例加增應用錫燭臺四箇錫燈
臺四箇錫茶壺二把錫酒壺二把黃銅面盆四箇
磁大碗二十箇小碗二十箇小盤十箇碟子十六
箇茶鍾十六箇酒鍾十箇蓆子十領白氈八條高
棹六張滿棹四張板橙六條椅子八張綿布門簾
六箇竹門簾六箇盛書大豎櫃四箇火盆四箇廣

鐵鍋二口小磁盆六箇水缸四口連鈎扁擔水桶
一副其篋子木杓柳確笤帚竹掃帚鐵通條鍋蓋
砂鍋木瓢等物皆各備具木器磁器如有損壞監
咨內務府府仍隨時添補每日應用煤炭照例內
務府煤炭局每日應送煤三十斤白炭三斤每月
總扣若干斤遣役送給冬月至正月每人每日各
加送烤炭白炭五斤十月底總計三月若干斤遣
役送給

一官生衣帽等項內務府廣儲司遵

旨辦給官生每人冬季各給貂皮領袖官用緞面細羊

皮袍褂紡絲綿襖中衣各一件染貂帽各一頂鹿

皮靴連氈襪各一雙此大鹿皮靴改給緞靴春秋二季各給

官用緞面杭袖裏綿袍官用緞面紡絲袖裏綿褂

紡絲衫中衣各一件絨緯涼帽各一頂官用緞靴

各一雙馬皮靴各一雙此大馬皮靴亦改給緞靴夏季各給硬

紗袍褂羅衫中衣各一件每年春季各給紡絲面

布裏棉被棉褥紡絲頭枕各一分跟伴四人每年

冬季各給布面老羊皮袍布棉襖中衣各一件貉

皮帽各一頂馬皮帮牛皮靴布棉襪各一雙春秋

二季各給布棉袍褂各一件夏季給單布袍布衫

中衣各一件雨纓涼帽各一頂每年春季給布棉

被褥頭枕各一分此項物件內除庫貯者領取成

做給發外其庫無之染貂帽貂皮帽絨纓涼帽雨

纓涼帽交該辦買催總等每季按時買給此項應

給衣帽俱於每年二月五月十月內國子監按季

出具印領內務府照數遣官送給

師生

周官掌教藝人有蘇師旄人鞮鞻氏之職皆大司樂總其成明時琉球入學不設教習其教法甚畧至我

朝康熙二十七年梁成楫等入學

上特命司成於肄業正途貢生中遴學行之優者奏舉一人為教習專司講解派博士等官經理之堂官不時加謹稽察其猶周制之舊與至於入學官生明初皆王子弟寨官子弟成化以後始遣三十六姓之人今多不可考謹就所見錄之尚冀後之人有

以補其闕畧云

祭酒

常錫布滿洲正紅旗人康熙二十五年任

時琉球梁成楫

等入學

德白色滿洲正紅旗人二十六年任

圖納哈滿洲鑲白旗人二十七年任

王士禎山東新城人戊戌進士十九年任

李元振河南柘城人甲辰進士二十二年任

翁叔元直隸永平衛籍

江南常熟人

二十四年任

曹 禾江南江陰人甲辰進士二十六年任

汪 霖浙江錢塘人丙辰進士二十八年任

臣按國學禮樂錄王士禛十九年任二十二年以後已為李元振而池北偶談載梁成楫等於二十三年經使臣奏請入學時士禛為祭酒咨覆禮部不解何謂謹闕之

伊爾登滿洲正白旗宗室雍正元年任時琉球鄭秉哲等入

學

塞楞額滿洲正白旗人已丑進士二年任

鄂宗奇滿洲鑲藍旗人壬辰進士四年任

王圖炳江南婁縣人壬辰進士元年任

王 傳江西饒州人辛未進士元年任

張廷璐江南桐城人戊戌進士三年任

蔡 嵩江南南匯人壬辰進士五年任

觀 保滿洲正白旗人乾隆丁巳進士十四年任

陞任後仍管監務時琉球鄭孝德等入學

全 魁滿洲鑲白旗人辛未進士二十四年任

富 廷滿洲鑲藍旗人丙午舉人二十七年任

陸宗楷浙江仁和人雍正癸卯進士十一年任

司業

宋古弘奉天鑲白旗人康熙二十五年任時疏球

學等入

彭定求江南長洲縣人丙辰進士二十四年任

董 闇江南吳江縣人癸丑進士二十四年任

吳 涵浙江石門縣人壬戌進士二十八年任

明 圖 六十一年任時

球鄭秉哲等入學

馬 泰奉天正白旗人 雍正元年任

黃鴻中山東即墨縣人戊戌進士元年任

孫嘉淦山西興縣人癸巳進士元年任

彭維新湖南茶陵州人丙戌進士三年任

王蘭生直隸交河縣人辛丑進士四年任

莊 楷江南武進縣人癸巳進士五年任

博卿額滿洲鑲紅旗人戊辰進士乾隆二十四年

任時疏球鄭孝德等入學

盧 穀貴州 人 進士二十四年任

吉 泰蒙古正白旗人 任

張裕榮江南桐城縣人戊辰進士二十六年任

派董率官

張鳳書雲南建水州人壬戌進士任博士

林人樾福建侯官縣人修道堂助教

張若霍江南桐城縣人正義堂助教

鄔鳳翊廣西陽朔縣人壬申進士由教授陞博士
教習

鄭名闕福建人康熙二十七年補教習一

年去

徐振浙江寧波縣人拔貢生二十八年補教習

三年咨部議敘以州同即用

李著湖北公安縣人拔貢生雍正二年補教習
數月去

趙奮翼陝西潼關縣人拔貢生三年補教習事竣

咨部議敘以知縣即用

潘相湖南安鄉縣人乾隆六年拔貢生二十三
年考充

武英殿校書二十五年琉球官生鄭孝德等入學經國
子監

奏充教習本年應順天鄉試中式四十一名二十八
年會試中式三十五名二十九年鄭孝德等還國
教習事竣二月初四日本監帶領引

見奉

旨潘相著以知縣用四月選授山東登州府福山縣知

縣

官生 病故官生附

日孜每闈八馬中山王察度之子 或云從子 明洪武二

十五年初遣入學詔令工部建王子書房於監前

以處之 歸之年闕

三五郎尾山南王承察度之從子與日孜每闈八

馬同年入學二十九年歸旋復來請卒業

仁悅慈中山王察度之舅 諸書作寨官子或其隨父為寨官也

中山王子入學

實他盧尾段賀志山南國寨官之子隨山南王子

入學

段志每中山國寨官子二十六年入學

麻奢理誠志魯三人中山國寨官子二十九年入

學

姑魯妹中山國人入學之年闕諸錄誤以姑魯妹為女官生荒誕殊甚

李傑山南國寨官子永樂三年入學踰三年歸後

做此各書又載永樂八年冬賜李傑等冬衣等項是六年猶未歸也未詳孰是

石達魯中山寨官子永樂四年入學凡六人其五

人闕

模都古中山官生永樂八年入學共三人帝及太

子厚其賜禮部尙書呂震曰昔唐太宗興學校新

羅百濟皆遣子入學當時僅聞給廩膳未若今日

賚予周備也帝曰遠方慕中國禮義故遣子入學

必足於衣食然後樂學太祖高皇帝命資給之著

於會典所謂曲成萬物而不遺者安得違之十一

年模都古乞歸省帝曰遠人來學誠美事思親而

歸亦人情宜厚賜以榮之因賜衣幣及鈔為道里

費給驛傳其二人闕

鄔同志久中山國寨官子永樂十一年入學共三

人亦作三十人餘人闕

周魯中山寨官子據池北偶談載之永樂十一年入學共

三人其二人闕

益智每琉球官生入學之年闕

蔡賓琉球國中山省久米村人久米屬村縣四曰東門村西門村北門村南門村亦名大門村舊有普門寺又名普門地明洪武中以閩人三十六姓賜琉球王命居此地至萬歷時存而昌者止梁鄭蔡金林五姓又續賜阮毛兩姓皆居久米不他徙故名唐營亦稱營中後改唐榮代以村中最貴者爲總理唐榮司專主朝貢事賓之上世居閩省泉州府晉江縣一日南安縣宋端明殿學士蔡襄之後襄之裔孫崇奉命入琉球傳四世至賓賓字玉亭成化十七年入學二十二年國王請遣歸國帝曰昔陽城在太學諸生三年不歸國者斥之矧遠人豈可長留不遣其令卽歸以遂定省之私賓歸後官長史弘治元年賓隨貢使皮揚那等來京上言成化中讀書南京國子監今吏部侍郎劉宣時爲祭酒特加撫卹乞容赴宣所執贄謝詔許之武宗登極賓又隨王舅亞嘉尼施等貢馬及方物奏

琉球入學見聞錄

乞每歲一貢禮部議琉球在昔朝貢不時至成化
十一年因使臣不法勅令二年一貢今因彼入貢
違期故爲此奏以飾非宜勿聽武宗特允之賓奏
乞自備工料修造貢船二隻禮部議行鎮巡官驗
實量修不必改造賓復奏武宗曰令二船拆卸補
造勿過式也賓子進字益亭正德五年同五人入
太學歸國之年闕官通事其四人闕

蔡浩字乾亭賓從兄寶之孫嘉靖五年同蔡廷美

鄭富梁梓四人入學

徐錄作二年疑誤

九年同歸國

蔡廷美字璞亭浩從兄官長史嘉靖二十年王遣
使殷達魯等入貢廷美與偕來二十一年廷美招
引漳州人陳貴等駕船之國適與潮陽船爭利互
相殺傷廷美乃安置貴等於舊王城盡沒其貲貴
等夜奔爲守者所掩捕多見殺於是誣貴等爲賊
械送福建廷美齎表將赴京陳奏巡按御史徐宗
魯會同三司官譯審別狀以聞留廷美等待命奉
旨貴等違法通番著遵國典重治琉球旣屢與交
通今乃敢攘奪貨利擅殺我民且誣以賊詭逆不

五十五
卷之三
恭莫此爲甚蔡廷美本宜拘留重處念素係朝貢
之國姑且放回後若不悛卽絕其朝貢令福建守
臣備行彼國知之

鄭富字貴橋其先福建福州府長樂縣人明洪武
中有鄭義才者奉命居琉球官長史義才字元橋
子孫世以橋爲字十三世後始易之猶蔡崇字升
亭子字盛亭孫字輝亭世世以亭爲字十世後始
易也富爲義才六世孫官爵無考

梁梓之先福建福州府長樂縣人明洪武中梁嵩
字子江奉命居琉球官長史梓其孫也世次不可
考歸國後官長史十九年中山王遣梓貢馬及方
物奏請造海舟四隻許之

梁炫嘉靖十五年同四人入學二十二年歸國時
炫等來學已踰七年炫官正議大夫充三十二年
貢使其三人無考

鄭迴字利山義才九世孫富從曾孫都通事祿式
橋次子也嘉靖四十四年同梁炤等入學歸國後
累官至法司以身殉難其詳見良臣傳

蔡煉字耀亭廷美長子同鄭迥等入學官都通事
鄭迥字格橋祿季子迥懷弟萬歷七年同鄭迪蔡
常入學歸國之年闕官長史

鄭迪字憲橋祿弟禮長子官都通事

蔡常字心亭廷美弟廷貴子官無考

梁成楫字得遠嵩九世孫祖應材字紹江正議大
夫父邦善字正議大夫充康熙二十一年貢
使生六子成楫其三也康熙二十七年同蔡文溥
阮維新入學三十一年歸官都通事子二人煌烈

蔡文溥字天章朝用四世孫朝用子延延子國器
器子應瑞應祥累世紫金正議大夫充貢使應瑞
有子五人文溥為長篤志問學著四本堂集畧見
第二卷累官紫金大夫子其棟孫功熙俱正議大
夫

阮維新字天受其先福建漳州府龍溪縣人明萬
歷時有阮國字我萃者與毛國鼎同奉命居琉球
官正議大夫充萬歷三十四年謝封使傳四世至
維新同梁成楫蔡文溥入學累官紫金大夫充康

熙五十三年貢使

鄭秉哲字

迴弟達元孫達子子孝子孝子宗

善繼善宗善子宏良累世正議紫金大夫宏良有子五人長秉均康熙戊辰入學折椀卒秉哲其第四弟也雍正二年同鄭謙蔡宏訓入學六年歸累官紫金大夫充乾隆十三年貢使又充二十二年謝封使

鄭謙字

父廷極正議大夫充雍正四年貢使

謙入學歸官存留都通事卒於福建館

鄭孝德字紹衣祖士絢正議大夫充雍正四年貢使父國觀少有志趣歲壬寅北學於闕從江某遊六年始歸乾隆九年充朝京都通官沒於館葬張家灣乾隆十九年孝德年二十隨婦翁紫金大夫蔡宏謨入請封乞省墓二十五年入學傷父志未就晝夜刻厲孜孜問學不怠手抄四書五經儒先語一衷於子朱子尤玩味小學近思錄等書善書法詩文皆有規矩臣題其座右曰欲爲海國無雙士來讀天都未見書所以望其成者固未有涯云

其弟孝思隨孝德來學二十九年二月卒於譯館
蔡世昌字汝顯文溥弟紫金大夫文河之孫都通
官文海之嗣孫正議大夫光君之長子也世昌入
學時年二十四與孝德相齟切不欲專為詞章學
臣有聯云人在海邦推俊傑學從京國問淵源蓋
記實也其詞章亦稟承矩度多可觀者
蔡宏訓文溥弟文漢次子同秉哲等入學數日病
卒禮部請 尸工二部發好棺木一口圍棺紅紬一疋並擡夫

損繩等物送至張家灣利禪菴塋地埋葬又

特賜白金三百兩以一百兩修墳以二百兩附貢使帶回
交宏訓母為養贍之費

梁允治字永安官外間親雲上祖曰得宗正議大
夫允康熙五十九年貢使父錫光官都通事允治
知讀書即喜從蔡澹園問津家故多書日夜披吟
忘寢食遂以其意繪身心性命圖又倣朱子或問
法著服制辨義乾隆二十二年王選士入學其大
夫首舉允治允治年二十九於四人最長初入謁

卽雍容有儀執經書孜孜請問日五七次不休一
句一字必求其至是字義偏傍聲音清濁不毫毛
放過詩文亦可觀居無何金型卒鄭孝德暨謙從
皆染疫允治偕蔡世昌日營喪務料理諸醫藥深
夜猶奔事諸患者不寢臥旬餘忽一夜來請曰鄭
孝德始知其妹夫金型之喪將出視其棺請呼工
人再黝之旦日令允治董工事遽臥答云生病甚
懼不起也驚視之已脫形急召院醫診視百方救
之竟以四月十九日卒於館

金型字友聖遠祖瑛洪武中自福建奉命入琉球
累世昌熾至型始入太學年十九資甚清喜讀書
在閩購

頒發諸經晝夜閱之忘寢餐因積癆瘵到監月餘咨太
醫院發數醫診治不效泣曰生甫入學遽若茲無
以報

天朝及我王之德貽老母憂不忠不孝語已復泣不及
他遂卒時庚辰歲三月十六日也一切
恩賜與梁允治並照蔡宏訓舊例奏准施行

教規

昔在先民教學有規蒙以養正炳若著龜譯館三箴於遠國諸生尤諄諄焉

朱子白鹿洞教條云父子有親君臣有義夫婦有

別長幼有序朋友有信五教之日博學之審問之

慎思之明辨之篤行之為學之序言忠信行篤敬

懲忿窒慾遷善改過修身之要正其誼不謀其利

明其道不計其功處事之要已所不欲勿施於人

行有不得反求諸己接物之要

程董二先生學則云凡學於此者必嚴朔望之儀

謹晨昏之令居處必恭步立必正視聽必端言語

必謹容貌必莊衣冠必整飲食必節出入必省讀

書必專一寫字必楷敬几案必整齊堂室必潔淨

相呼必以齒接見必有定修業有餘功游藝以適

性使人莊以恕而必專所聽

真西山教子規云一日學禮恭敬順從遵依教誨

則行毋得二曰學坐足身端坐齊脚歛手毋三日

學行籠袖徐行毋四曰學立拱手正身毋五日學

言樸實語事毋得妄誕六曰學揖低頭屈腰出身

慢七曰學誦專心看字斷句慢讀須要字字八曰

學書專心把筆字要齊整

朱子小學題辭云元亨利貞天道之常仁義禮智

人性之綱凡此厥初無有不善藹然四端隨感而

見愛親敬兄忠君弟長是曰秉彝有順無強惟聖

性者浩浩其天不加毫末萬善足焉眾人蚩蚩物

欲交蔽乃頽其綱安此暴棄惟聖斯惻建學立師

以培其根以達其支小學之方洒掃應對入孝出

恭動罔或悖行有餘力誦詩讀書咏歌舞蹈思罔

或逾窮理修身斯學之大明命赫然罔有內外德

崇業廣乃復其初昔非不足今豈有餘也遠人亡

經殘教弛蒙養弗端長益浮靡鄉無善俗世無良

材利欲紛拏異言喧沓幸茲秉彝極天罔墜爰輯

舊聞庶覺來裔嗟嗟小子敬受此書匪我言耄惟

聖之謨

程子視箴云心兮本虛應物無迹操之有要視為

之則蔽交於前其中則遷制之於外以安其內克

已復禮久而誠矣聽箴云人有秉彝本乎天性知誘物化遂亡其正卓彼先覺知止有定閑邪存誠非禮勿聽言箴云人心之動因言以宣發禁躁妄內斯靜專矧是樞機與戎出好吉凶榮辱惟其所召傷易則誕傷煩則支已肆物忤出悖來違非法不道欽哉訓辭動箴云哲人知幾誠之於思志士厲行守之於爲順理則裕從欲惟危造次克念戰兢自持習與性成聖賢同歸

朱子敬齋箴云正其衣冠尊其瞻視潛心以居對

越上帝足容必重手容必恭擇地而蹈折旋蟻封出門如賓承事如祭戰戰兢兢罔敢或易守口如瓶防意如城洞洞屬屬罔敢或輕不東以西不南以北當事而存靡他其適勿二以二勿參以三惟精惟一萬變是監從事於斯是曰持敬動靜弗違表裏交正須臾有間私欲萬端不火而熱不冰而寒毫釐有差天壤易處二綱既淪九法亦斃於乎小子念哉敬哉墨卿司戒敢告靈臺

朱子學古齋銘云相古先民學以爲己今也不然

爲人而已爲己之學先誠其身君臣之義父子之
仁聚辨居行無怠無忽至足之餘澤及萬物爲人
之學爛然春華誦數是力纂組是誇結駟懷金煌
煌煒煒世俗之榮君子之鄙維是二者其端則微
眇綿不察胡越其歸卓哉周侯克承先志日新此
齋以迪來裔此齋何有有圖有書厥裔伊何衣冠
進趨夜思晝行諮詢謀度絕今不爲惟古是學先
難後獲匪亟匪徐我則銘之以警厥初

朱子求放心齋銘云天地變化其心孔仁成之在

我則主於身其主伊何神明不測發揮萬變立此
人極晷刻放之千里其奔非誠曷有非敬曷有執
放孰求孰無孰有屈伸在臂反復維手防微慎獨
茲守之常切問近思曰惟以相之

呂維祺介孺四譯館訓士三箴其言行總箴云心
官則思言行分職謂士樞機於斯樹極匪樞胡運
匪機曷發戶弩猶然士軌廼識口則興戎動或罔
益惟聖達時退藏於密知語知默知動知息其次
克己主敬宅一非禮勿言惠迪趨吉閑邪存誠爰

五子學會錄卷之三
三
象斯立言滿寡尤淑儀弗忒六字之內弗易厥質
心之思之有物有則思則得之不思曷得其言箴
云思言胡慎曰忠與信匪口是緘惟心斯印人心
之靈稟於至誠物欲蔽之欺偽叢生厥口則言厥
心未然信既遠義易諾屢遷言巧色令是名爲佞
不信不忠曷存厥性厥性既非衆惡斯歸多言數
寤食言貌肥我思動物寧在鼓舌所以至誠豚魚
可格此非襲取忠信是主易訓進德三復斯語其
行箴云何以思行蓋云篤敬篤敬維何玉一而靜

一則不雜靜則不競天君守舍百司從令胡爲憧
憧朋從靡定以二以三乃縱乃橫浮薄長傲失其
性命既潰厥堤靡知所竟我思古人精義入神天
之明命以物其身上帝臨汝如見大賓靜一無欲
乃敬乃篤夫然後行百行維穀是故君子必慎其
獨

朱子曰讀經要反復精詳方能漸見旨趣誦之宜
舒緩不迫令字字分明更須端莊正坐如對聖賢
則心定而義理易究不可貪多務廣涉獵鹵莽纔

看過了便謂已通小有疑處即便思索思索不通
卽置小冊子逐一抄記以時省閱切不可含糊護
短恥於質問而終身受此黯黯以自欺也起居坐
立務要端莊不可傾倚恐至昏怠出入步趨務要
凝重不可剽輕以害德性以謙遜自牧以和敬待
人凡事切須謹飭無故不須出入少說閒話恐廢
光陰勿觀雜書恐分精力早晚頻自點檢所習之
業每旬休日將一句內書溫習數過毋令心少有
放佚則自然漸近道理講習易明矣

又示長子受之曰早晚受業請益隨衆例不得怠
慢日間思索有疑用冊子隨手劄記候見質問不
得放過所聞誨語歸安下處思省要切之言逐日
劄記不得擅自出入人來相見啓稟然後往報之
此外不得出入一步居處須要恭敬不得倨肆惰
慢言語須要諦當不得戲笑諠譁凡事謙恭不得
尙氣凌人自取恥辱不得飲酒荒思廢業亦恐言
語差錯失已忤人尤當深戒不可言人過惡及說
人家短長是非有來告者亦勿酬答交遊之間尤

當審擇雖是同學亦不可無親疎之辨皆當請於先生聽其所教大凡敦厚忠信能攻吾過者益友也其詭諛輕薄傲慢褻狎導人爲惡者損友也但恐志趣卑凡不能克己進修則益者不期疏而日遠損者不期近而日親雖有賢師長亦無救拔處矣

右先儒教學遺規不能詳錄然得此而玩心焉固終身用之不能盡也竊念諸生地居炎徼人慕華風緣國典以陳言邀

天恩而入學儒途遠大經義淵深問學宜勤率由匪易其各仰遵前軌恪聽師言有物有恒毋蕩閑而踰檢自卑自邇庶行遠而登高今將學中規條開列於後

一每月朔望早起沐浴正衣冠候

大人拜

廟後隨班拜

廟三跪九叩首次拜

後殿三跪九叩首次謁 文公祠一跪三叩首已隨詣

五子入學之門
卷之三
五

葵倫堂上堂打三躬退詣講堂打三躬

一未領衣冠時服該國冠服已領之後卽服所賜冠服

一每日早起沐浴正衣冠詣講堂聽講小學數條

小學完講近思錄飯後講經數條臨帖燈下講四

六古文各一篇詩一首次日背誦

二講書之時諸生以齒序立專心聽講或有語言

不通意義未曉者須再三問明

一聽講之後各歸本位肄習衣冠必整肅出入必

恭敬行步必端莊不得笑語喧譁

一逢三日作詩一首不拘古律逢八日作四六一

天子篇或論序等類一篇

一跟伴須各自約束不得恣其出入聽其傲慢有

乖禮法

答問

數年答問積成卷帙於初入學數條亦足以見其大凡錄之於篇以示心同理同罔殊遐邇也

問學生之學以何者爲先臣以爲學莫先於定趨

向故即其所明者而告之曰邦畿爲萬國攸止之區故中山僻處海南萬有餘里而北拱神京必自姑米開洋梯更沙漏經颶翻颶吼之險晝夜一針或兼旬或十數日始收帆乎榕城已而由瓊河過錢塘越金陵歷山左水陸之程四三月方抵畿輔入廣寧門止四譯館乃欣覩

天子聖德神功仰觀

宮闕之壯城池苑囿之大人物衣冠禮儀之盛親賢士大夫之光耀然後歎爲天下之大觀而私心自慰曰向之所志者今乃得止於斯也維諸生之於學也亦然夫道之在天下雖有明晦絕續之不同而道外無人人外無道極乎天覆地載之遙苟有血氣無不同此心而同此理又况琉球近屬牛女星紀之次與揚州吳越同一分野哉我

皇上以堯舜之君兼孔孟之師胞

論太學士子務以聖賢爲志不溺於俗學異學與夫權謀術數一切就功名之說而聲教暨訖一視同仁弗忍窮微絕島一處一人之晦盲否塞

致珍入學見聞錄 卷之三
特允諸生遵例入學

深恩厚澤視前代之所以待乎新羅百濟子弟者不啻
什伯諸生恭承

天詔負笈來學學固在於先立其志也程子曰言學便
以道爲志言人便以聖爲志故大學之道端重知
止煌煌

聖諭

諸大人師長之宣揚之者提命誥切六館數百人無
不遵也諸生豈能自外且夫學者之病大半在於
以取利祿爲急務今諸生世祿世官富貴本所自
有奔競之習得喪之念既不庸縈於懷來其於學
也甚易誠能志於正學先取小學立教明倫敬身
稽古內外之篇講習而服行之得其培根達支之
教有以收其放心而養其德性然後取近思錄一
書而誦讀之而踐體之凡夫求端用力修己治人
辨其端觀聖賢之道皆能見其梗槩由是可以進
究乎四子六經而求聖賢之大全蓋修身大法備
於小學義理精微詳於近思錄近思錄者四子之

階梯四子者六經之階梯也仰模範之甚近念教
規之至詳竊不自知其庸陋而願與諸生共勉之
右端趨向

問下國習尚各有所宜祈俯而教之何如曰夫人
函五常之性乘五土之氣故其材不一而其習各
殊幽燕之沉勁吳楚之剽疾囿於墟也唐魏之勤
儉鄭衛之淫恣染於俗也古之聖人明於此莫不
以變習尚爲先務故直寬剛簡化以詩樂沉潛高
明歸於正直而南北強勇必進之君子以和其血

氣心知而約之於仁義中正故曰司徒修六禮以
節性明七教以興德齊八政以防淫一道德以同
風俗方今

堯文炳煥萬國同聲象寄狄鞮靡不一其心志而新其
見聞盡聲教之漸被暨訖涵煦於百數十年之深
者不問海內外無大小咸風移而俗易也諸生萬
里來學固將以去故而卽新也何習尚之狃焉且
夫古之所謂豪傑必有轉風氣而不爲風氣轉之
心昔在勾吳不齒上國而言氏北來獨傳禮教遂

五珍小學圖金 卷之三
使南方之學得其精華江左風流於斯爲盛亦越
陳良荆蠻所產而北學中國丕變頽風其流至於
濂溪生長衡疑不出師傳默契道體肇開伊洛淵
源若夫洛陽舊俗理學無聞而二程繼起獨肩斯
文及乎龜山還里稱曰道南數傳而徽國篤生大
成用集到今八閩問學猶傳正派安溪漳浦遺徽
堪仰他如文翁好學而川蜀崇文趙德爲師而湖
陽知學一國之風一方之俗莫不變於一人而傳
於千載故習尙非一成也其所以漸之者然也且

卽琉球論之隋唐以前不通中土史書所載薦紳
難言近自明初入貢漸染華風繼之以國主好交
遣子入學又繼之以三十六姓之往鐸而士知禮
義然猶未曠然一變其俗也自金大夫請祀

先聖程大夫請興學校蔡法司傑然篤志正學而國王
尊之國人信之諸生亦因以知有宋明及

本朝儒先講學之書視從前之習尙不啻秦越人之不
可共語此豈有異故哉理義同然而導之者善也
顧有書而不讀猶書肆也讀之而不得其趣猶買

積而還珠也故欲求其新先去其故欲新一國之人先新一已之心而新乎人非一時一世之事新乎已非一朝一夕之功蓋變習尙者非强有力弗能也而力因乎識識因乎學學之道非可兩是而並存之也誠能屏除舊見靜坐終日使此方寸之中凝然湛然如山斯靜如泉斯清而後徐徐以正書植之以新義灌之篤信力踐弗怠數年勿揀擇難事泛問如定夫勿一日三次檢點如和叔將優游漸漬忽不覺其學識之大異於從前而權度存

心雖賁育弗之奪也有力如此於以歸國而移易習尙弗難矣昔康崑崙自服其琵琶之術世莫已敵及遇段師善本而斥其邪雜語之以十年不近樂器忘其本領而後可與學入神之曲故蒙今亦願諸生之忘其本領也

右變習尙

問古今之書充棟汗牛學生輩苦不能多讀何如曰夫讀書有要非必徧觀而盡識也不得其要則雖識如安世覽若正平祇以誇多而鬪靡苟得其

要則雖難熟如于嵩善忘若陳烈亦可漸積而有
得慨自秦火方炎簡編爲燼漢至孝惠始除挾書
之律孝文以後書出屋壁詩始萌芽至於建元然
後鄒魯梁趙頗有詩禮春秋先師當此之時一人
不能獨盡其經此雅彼頌相合成編洎魯共壞宅
古文初見有逸禮三十九書十六篇及春秋左氏
猶復共相排擯杜塞不學故西漢諸儒自匡衡劉
向揚雄而外皆罷老專究一藝學詩者不知書學
書者不知易學易者不知春秋雖其專已守殘見

譏子駿而余竊觀其行事讀其文章類皆稟經斷
獄酌雅修詞由漢以後書籍日富五車四庫詳志
藝文及乎後唐明宗初令印賣九經得書甚易藏
書愈多而士或束閣不觀游談無根卽曰擁書萬
卷不假南而百城而其人之言行亦或往往不及
乎古誠有如蘇文忠之所誚者此其故何哉不知
讀之之法而多反爲累也夫專務博記非聖賢之
所貴也昔者上蔡謝子舉史成誦明道以爲玩物
喪志謝子面赤耳熱汗流浹背明道又以爲此卽

惻隱之心然謝子猶未心服也一日見明道看史亦復逐字逐句無所遺漏然後恍然有悟以爲爲己爲人之別自後遂將此事接引博學之士卽朱子之論格物雖有一書不讀便闕一書理道之言而究以窮天理明人倫講聖言通世故爲先務故誦詩而昧乎從政雖三百亦徒多窮論語而明於爲治卽半部不爲少且夫讀書而精於別擇者其書亦本不多也韓昌黎自序所以用功惟在辨古書之正僞與雖正而不至焉者昭昭然若白黑之

分故其生平於禮樂名物陰陽土地星辰方藥之書未嘗聞而不求而要必曰非三代兩漢之書不敢觀誠辨乎僞也辨乎僞則不但百家小說之爲僞也卽歷代名儒之集亦多僞焉不但非聖賢之書之爲僞也卽四子六經之箋注亦多僞焉不但異學雜學所傳之爲僞也卽如二程語錄游楊侯尹之所記亦各純駁參半且雖朱子之書而語類或問文集與大注所定前後殊解彼此異說後之人且復倒顛歲月以爲晚年定論是極正之書亦

或有萬一之僞也若夫詩文一途其僞者常十之七其正者常十之三而中郎枕秘惟有論衡明允篋中專批孟子廬陵半生酷摹韓文考亭末歲愛誦杜詩古之人莫不博觀而約取明辨而篤志故曰專精之至神奇自生養叔治射庖丁治牛師曠治音聲僚之於丸秋之於奕皆終身不厭而無暇外慕然後造其堂躋其域也君子多乎哉請以爲諸生規

右辨正僞

問書之正僞既聞命矣其讀之也當奈何曰凡讀書有本原有次序有綱領有要法何謂本原朱子曰讀書之法莫貴於循序而致精致精之本則在於居敬而持志蓋心之虛靈神明不測一有不存則視聽貌言不能自檢未有不爲仰面貪看鳥回頭錯應人者安能反復聖言參考事物以求義理至當之歸故曰心要在腔子裏心存則終日儼然不爲物欲所侵讀書窮理夫安往而不通也何謂次序大學者羣經之總會規模廣大而本末不遺

五經見聞錄 卷之三
節目詳明而始終不紊其學之也宜最先次論語
二十篇爲聖師言行之要次孟子七篇皆王道仁
義之談學之則有以識乎操存涵養之實與夫體
驗擴充之端且知某章某句之爲格致誠正某章
某句之爲修齊治平凡大學所總言者二書皆分
見之而有以信其確不可易至於中庸則聖門傳
授之心法也上達之意多下學之意少必大學論
孟之既通然後可以讀之而見其爲實學故不先
之大學則無以提學綱領而盡論孟之精微不參

諸論孟則無以發揮縕奧而極中庸之歸趣若不
會其極於中庸則亦無以窮神知化而建立天下
之大本經綸天下之大經凡此皆朱子師弟之言
而後人所當服行者也四書卒業乃讀五經五經
如五常詩屬仁禮屬禮書屬智春秋屬義易屬信
而貫乎四德夫五行首木四時首春於人則性情
之勃發而不能自己如春如木故詩之爲教常使
人諷誦焉而惻然悚然有以動其自具之天良於
仁之功居多而爲學人所宜先三千三百無不切

於日用橫渠教人莫急於此書者古帝王治天下之大經大法也學焉而盡其蘊則可以明理可以處事由是而習春秋乃得見聖心裁制之義故曰諸經之有春秋猶法律之有斷例也又曰諸經如藥方春秋如用藥治病至於易爲五經之源仁義禮智皆統兼焉故曰乾元亨利貞其讀之也必並乎諸經其通之也倍後乎諸經通經者又必通史二十二史浩繁難記涑水之通鑑紫陽之綱目先正課程皆計日而兼讀之力有不能無寧舍焉

從朱若夫讀書之綱領

頒發諸書各卷首詳言之矣要在博考乎諸儒折衷於考亭卽考亭之說四書如語類或問文集小注爲說不一又必以大註之說爲定但大註未易言也朱子嘗云某字字如秤停又云不用聖賢許多工夫看聖賢的不用某許多工夫亦看某的不出始舉一二條言之如同一仁字或云愛之理心之德或云心之德愛之理或云當理而無私心或云無私心而當於理或云人心或云本心之德或

云心之全德移步換形不可執一又所引之說皆
經更定虛字語助各有妙義今試取程張范謝游
楊侯尹本書與之校對始見其增減改換文理密
察直如神禹之鑄鼎周公之定禮沉潛反復久之
有得然後可以明聖傳之統成衆說之長折流俗
之謬易之書經乎四聖而斷以夫子之易卽文周
之易文周之易卽伏羲之易言易之書約有百家
而總以十翼爲主以費直合傳解經爲有功卒以
學易可以無大過是易爲人事切要之書也和順

於道德而理於義窮理盡性以至於命是易爲言
性與天道之書也以言者尙其辭以動者尙其變
以制器者尙其象以卜筮者尙其占是聖人之用
易其道有四也居則觀其象而玩其辭動則觀其
變而玩其占是君子之學易其道有四也初爲本
上爲末中四爻爲雜物撰德要之觀其彖辭則思
已過半是學者之解易其大指惟一致也不可離
象數不可厭事理不可專說卜筮一卦一爻之詞
不可分某句爲象某句爲占讀卦辭不可於彖傳

之外生一解讀又詞不可於象傳之外添一義由
是以考河洛先後天之圖莫不皆然則中有主而
不惑於聚訟矣讀堯典便須知堯之爲君之所以
大其則乎天而民無能名者如何其巍乎成功而
煥乎文章者如何舜禹之有天下而不與者如何
舜自受終以後其所以創制者如何舊人但知言
以攝位告攝
位二字卽位以後其所以無爲者如何又若讀堯
亦非是
典便須知天文讀禹貢便須察地理舉一反三是
在善讀者讀詩亦然如誦關雎便須真見其哀樂

真見其不淫不傷然後可與說詩春秋傳爲按經
爲斷以傳考經之事迹以經別傳之真僞大抵無
隱語無凡例不以日月爲褒貶不以官爵名氏爲
貴賤未嘗許五霸未嘗貴盟會未嘗與齊晉未嘗
黜秦楚吳越但不主諸儒先入之言平心觀理而
聖人之情漸可意逆朱子所謂據事直書其義自
見也古禮之亡久矣周官一書固爲禮之綱領至
其儀法度數則儀禮乃其本經而禮記郊特牲冠
昏等篇乃其義疏朱子以儀禮爲經取禮記及諸

書之言禮皆附於本經之下名曰儀禮經傳通解
喪祭二禮勉齊續之洵禮學第一書也然學者仍
以難讀置之竊謂禮記雖傳先聖遺言亦多附會
之疵其篇第失次每篇之中又錯雜不倫間倣朱
子之法用王氏以言冠者入冠義言昏者入昏義
之說別爲凡例篇以義序文以類從圖繪文左使
讀者便覽並取禮制之大者附之以補本記所不
備注則兼取漢唐宋元明之說務從簡要仍以曲
禮爲第一由小學而大學故少儀樂記射義投壺

學記經解大學中庸儒行易表記次之二十以後
冠昏而有家室故冠義深公昏義哀公問次之內
則大傳又次之家禮莫重於冠昏喪祭故喪大記
檀弓問喪問傳小記服問三年問喪服四制奔喪
雜記曾子問次之祭法郊特牲祭統祭義又次之
出家而鄉故鄉飲酒次之由鄉而邦國朝廷故王
制玉藻明堂位月令文王世子燕義聘義次之然
後終之以閒居燕居禮運禮器緇衣等篇以統論
禮之大凡而各篇之中又各有次序條理如珠聯

而繩貫周禮儀禮亦倣此爲經傳撮要禮之綱領
其庶幾乎至於讀之之法以二書言通一書然後
及一書以一書言通一篇然後及一篇字求其訓
句索其解未得乎前則不敢求乎後未明乎此則
不敢志乎彼先以熟讀使其言若出於吾之口繼
以精思使其意若出於吾之心又必以心體之以
身驗之從容默會於幽閑靜一之中超然自得於
書言象意之表凡儒先之所以教人者千言萬語
大指實不外此謹約記其所聞者以爲諸生勗焉

右巖課程

五子遺身附錄

卷之三

三

卷之三終

--	--	--	--	--	--	--	--	--	--

32474

